

Un rat'i ora cu Tanta Dora



Conbai muchanan?

Sigur hopi di boso a jega di mira con nan ta traha cas. Ora di pone tera den e vloer promé cu basha cement, nan ta bati'é cu un **pilon**. Un pilon ta di un pida palo vierkant cu un steel tambe di palo y e ta hopi pisá, esey ta pa bati e vloer haci'é pareu y nos ta bisa nos ta **piloná** e vloer. Ta muha e vloer prome cu awa pa e sera bon. E casnan di antes cu ta wordo trahá di lodo nan ta haya un vloer di klei y ora caba di pilona e vloer, e ta keda bon duro y fini.



E casnan di lodo di antes ta wordo trahá prome asina 'ki: ta traha e curpa di palo gevlecht den otro, nos ta jama e palonan ey **bara**. Caba ta jen'é cu lodo muhá mescla cu jerba seco. Ta sera e lugarnan habrí di e curpa di cas cu e mescla ey. Riba dak ta bin palo di mainshi, pero prome cu esey ta pone promé troncon di palo cu nan ta splijt den dos y ta pone bara mas diki. Caba nos ta pone e palonan di mainshi un banda di otro, un trabao puntual pa no keda ningun **screef** ni **ifi**, esta ningun habrí. Nos ta bisa cu nos ta **stiwa** e palonan di mainshi riba e dak, y ora awa jobe e no ta basha pa'den.

E cas mes ta blanch'é cu kalki blanco y ta tira un blachi di aloë aden. Asina nos ta

jama e casnan asina 'ki **cas di torto of cas di palo di mainshi**.


Kisas boso a jega di mira riba un botica of un recibo di botica of un saco di botica un pintura manera un beker cu un palo aden, nos ta jama esey un **fenso**. E



ta wordo usá pa traha remedi. Aworaki bo ta haya remedi den forma di pildo, pero antes tur remedi ta bin na polvo lorá den papel. Esaki nos tabata jama **pulchi**. E fenso ey tambe nos por us'é pa machica specerij, manera konoflok y kruidnagels. Mangel dushi y marga pa traha bolo preto tambe nos ta bati'é den fenso.

Ora nos tin un rosario nos ta ward'é den un kopchi, sea di palo of di plastic, pero algo di cabana fini di cual un ta mas smal cu otro pa e schuif drenta den otro. Antes nan tabata us'é warda cen, pero tambe pa rosario. E jama **koti** y e ta wordo trahá na man door di nos antepasadonan cu ta traha sombré di cabana. E pida plat cu ta cuminsa traha e sombré cun'é **ropiyo**, despues ta bin e **copeta** y ultimo e rand. Na Aruba bo no ta haya hende ta traha sombré di cabana mas, pero no Antiyas y demas islanan Caribe bo ta haya nan y nan ta bendenan cu turista.

Muchanan te otro luna cu poder di Dios...



Tanta Dora

luvidio



Chabalito

Number 8 - Año VI - Afl. 2,=



Choq



emco

ARUBA'S
Mall
Balashi



BIBLIOTECA NACIONAL ARUBA



3 0993 00185 667 3